

TOLOSA. VI. Literatur Astea ari dira egiten egun hauetan Samaniego Ikastetxeak.

Esti Ezeiza

Igandean Haur Liburuaren Eguna izan zen eta, hori dela eta, Samaniego Ikastetxeak Literatur Astea antolatu dute egun hauetarako. Astelehenean hasi ziren, eta etzi arte iraungo dute jardunaldi hauek. Ikasturtean zehar irakurzaletasuna bultzatzeko egiten ari diren ekimenen bilgune dira saio hauek.

Urtean zehar, alde batetik, Banbulo kanpaina gauzatu dute. Honen barruan, ikasleek liburu bat irakurtzen duten bakoitzean, gometsa bat eranstean dute liburutegian dagoen Banbulo erraldoiean, eta fitxa bat betetzen dute. Hala, irakurritako liburu kopuruaren arabera, dominak banatzen dituzte. Bestetik, idazketa tailerra eta zenbait idazleren bisita ere izan dute ikasturtean barna.

Hiru oinarri

Seigarren aldia da Samaniegoak egitasmo hau antolatzen dutena. Aste honetako jardunaldiak hiru ekintzetan oinarritzen dira: batetik, Liburu Egunari buruzko marrazkien erakusketa pasiloetan eta liburutegian. Bestetik, testu literarioei buruzko zenbait ekimen, horien artean, ipuin kontaketak, antzerkiak, eta olerki emanaldiak. Eta, azkenik, irakurketa maratonia egingo dute. Maratoi honetan, ordu laurdenero, ikasle edo guraso batek testutxo bat irakurriko du, eta hau megafonia bidez gainontzeko ikasgeletan ere entzun ahal izango da. Egitarauan barne, Orixe Institutuko ikasleek eskainitako poesia emanaldira joan ziren atzo 5 eta 6. mailako ikasleak. Nahiz eta hasieran harreta jartzeko interes handiegirik ez zuten erakusten gaztetxoek, emanaldia hasi eta minutu gutxitarako hauen zentzumen guztiak saioan zentratu zeuden.

Erabiliko diren hizkuntzei dagokionez, euskararen normalizaziaren aldeko apustua eginez, ekintza gehienak euskara hutsean burutuko dituzte. Hala ere, biharko irakurketa maratonean ahalik eta hizkuntza gehien erabiltzen saiatuko dira. Horretarako, irakasle, guraso eta bestelako ezagun batzuk lagunduko dute. Maratoi honetan, besteak beste, entzun ahal izango dira: euskara, ingelesa, gaztelania, jola (Afrika mendebaldeko hizkuntzetako bat), portugesa, alemaniera, italiera, braillea, zeinuen hizkuntza eta ukrainera.

Antolatzaileen esanetan, ikasturtez ikasturte jende gehiago inplikatzeko ari delako oso pozik daude. Literatur Astea jadanik ohitura bihurtu omen da; horregatik, aurreko urteetako irakasle, guraso, eta zaintzaileez gain, sukaldari batzuk ere jardungo dira. Horrela, parte hartzen dutenei oroigarri berezi bat ematen diete, haien partaidetza eskertuz.

Musutruk

Ikastetxeak diotenez, Literatur Aste honen arrakasta partaidetza xumean datza. Hau da, zenbaitetan kanpotik idazleak edo ipuin kontalari profesionalak etortzen badira ere, egitarauaren zatirik handiena normalean gauza horiek egiten ohituta ez dagoen jendeak betetzen du. Hau, boluntario moduan, laguntzeko eta parte hartu nahi dutelako egiten dute. Horren adibide dira ONCEtik braillez irakurtzera joaten den mutilak bere saioan islatzen duen ilusioa, eta etorkin batek irakurketa maratonia besteen aurrean bere hizkuntzan irakurtzean adierazten duen harrotasuna.